

Негізгі ережелер түсіндірілді



«Қостанай жол бөлімшесі ЖП» ҚТЖ ҰК» АҚ Құсмұрын филиалының ұжымымен «Террористік қауіп пайда болу жағдайында жүріс-тұрыс ережелері» тақырыбына дәріс сабағы өткізілді.

Аталмыш іс-шара 2018 жылғы 8 қарашада Құсмұрын станциясында өтті. Дәріскоубарысында станция ұжымына террористік қауіп пайда болу жағдайында адамдардың негізгі өзін-өздері ұстау ережелері түсіндірілді. Сондай-ақ, ұжым мен мекеменің қызметшілеріне жарылғыш затқа ұқсас күдікті зат табылған кезде, телефон арқылы объектінің миналанған қауіп туралы хабарлама алған, жазбаша түрде қауіп түскен жағдайда, террористік акті жасау, жарылғыш қондырғының жарылу барысында қызметкерлердің іс-әрекеттерінің алгоритмі жеткізілді.

Сонымен қатар, қатысушыларға 2016 жылы Ақтөбе және Алматы қалаларында болған шынайы төтенше жағдайлары айтылды.

Сабақ соңында қалаушыларға террористік қауіп пайда болу барысында жүру ережелері туралы буклеттер мен жаднамалар үлестірілді.

Е. ЕЛУКЕНОВ,
Құсмұрын ст. ЖПБ бастығы
полиция капитаны

Курсанттар - «Дельфин» сәбилер үйінде



Дана халқымыз ертеден «жетім көрсен жөбей жүр» деп жетімін жылатпаған. Қазақстан Республикасы Ішкі істер министрлігінің Шырақбек Қабылбаев атындағы Қостанай академиясының 103-оқу тобының курсанттары қызметтік борышынан тыс игілікті іске де көп көңіл бөледі.

«Жетім қозы – жатбауыр, жетілер де отығар» демекші, 2018 жылдың 27 қазанында (сенбі күні) «Дельфин» сәбилер үйіне курсанттар өз ықыласын танытып, азды-көпті болса да өз тараптарынан қамқорлық жасап, ерекше ықыласпен көмек көрсетті. Дәлірек айтсақ, сәбилерге көңіл бөліп сыйлықтарын сыйлап, сәбилер үйінің ауласын тазалап, өзге де шаруашылыққа қол үшін тигізді.

Өкінішке қарай, қазіргі таңда жетімдер үйінде жанары жасты, жүрегі жүдеу бейкүнә сәбилер көбеюде. Ер жеткізіп, ел қатарына қосатын қамқорлық таныту мемлекеттің маңызды міндеті болып табылады. Біздің әрқайсымыз сол мемлекеттің бір бөлшегіміз. Қайсы-қайсымыз болса да қолдан келгенше көмек қолын созсақ, соғұрлым жамандық атаулыдан алшақ болатынымыз айдан анық. Бұл орайда, академияның жасаған игілікті істері мен көрсеткен қамқорлығына дәлел жетерлік.

«Дельфин» сәбилер үйінің ұжымы өз тарапынан алғыстары мен ризашылықтарын білдірді. Әрбір адам баласы бұл дүниеге жетім болу үшін келмейді. Сондықтан да қатыгездікке жол бермей, жастардың бойында қайырымдылық сезімін ұялатып, өскелең ұрпақты рухани жағынан тәрбиелеген абзал! Болашақ бүгіннен басталады!

А. ӘБДӘЛІ,
ҚР ІІМ Ш.Қабылбаев атындағы
Қостанай академиясының ҒЗО ғылыми
қызметкері
полиция капитаны

Рухани жаңғыру - болашаққа бастар жол

Жаңа тарихи заман, ғаламдану дәуірі, жаһандық кезең. ХХІ ғасырдың талаптарына сай болу үшін ең алдымен бәсекелестікке қабілетті мемлекет болуымыз және дамыған 30 елдің қатарына қосылуымыз қажет. Ол үшін ұлттық құндылықтарды ұлағаттап, бірегейлікті сақтай отырып, сананы жаңғырту керек.

Егемен еліміздің ертеңіне алаңдаған Мемлекет басшысы Нұрсұлтан Әбішұлы Назарбаев ел қамын еш уақытта назардан тыс қалдырған емес. «Болашаққа бағдар: рухани жаңғыру» атты бағдарламасы да еліміздің бүгін мен болашағына деген алаңдаушылығының айқын көрінісі. «Рухани жаңғыру» тәуелсіз елдің тамырын кеңге жаюына, іргелі істердің алға басыуына, заманауи сананы кейін қалмай, жаңа дәуір белесін бағындыруға бағытталған ауқымды бағдарлама. Елбасымыздың көздеген межесі әлемдегі 30 елдің қатарына қосылу стратегиясы да осы бағдарлама аясында жүзеге аспақ. Демек, жаңа тарих толқынына қадам басып жатқан жас мемлекетіміз өз мақсат-міндеттеріне батыл қадам басқалы тұр.

Елбасының рухани жаңғырудағы алға қойған маңызды бағыты – прагматизм. Кез келген халық өсіп-өркендеу үшін заман ағымына ілесіп, үнемі жаңарып, жақсы қасиеттерін жетілдіріп отыруы қажет. Нақты мақсатқа жетуге, білім алуға, саламатты өмір салтын ұстануға, кәсіби тұрғыдан жетілуге басымдық бере отырып, осы жолда әр нәрсені ұтымды пайдалану – мінез-құлықтың прагматизмі.

Басты мақсаттың бірі – ұлттық бірегейлікті сақтауымыз керек. Елбасы айтқандай, ұлттық салт-дәстүріміз, тіліміз бен музыкамыз, әдебиетіміз, жоралғыларымыз, жалпы ұлттық рухымыз бойымызда мәңгі қалуы тиіс. Әрине ұлттық тәрбие отбасыдан, балабақшадан, мектептен басталады. Сондықтан татулық пен бірлікке баланы кішкентайынан тәрбиелеуіміз қажет. Қазақ жерінде бірнеше ұлт бір үйдің адамындай өмір сүріп жатыр. Ол біздің ата-бабамыздың берген тәрбиесі. Сол тәрбиені ұстанып, болашақ ұрпақтың бойына сіңіру біздің міндетіміз.

Білімді бәрінен биік қоятын ұлт қана табысқа жетеді. «Білімді, көзі ашық, көкірегі ояу болуға ұмтылу» - деп Елбасымыз айтқан болатын.

Қазақстанның революциялық емес, эволюциялық дамуы. Біздің кешегі тарихымыз бұлтартпас бір ақиқатқа – эволюциялық даму ғана ұлттың өркендеуіне мүмкіндік беретініне көзімізді жеткізді. Білімділікке ұмтыла отырып жаңа технологияларды меңгеру, саяси реформа мен экономикалық өсу ретінде қалыс қалмау керек екендігі де қамтылған. Тарих қойнауының терең тұңғығына бойлай отырып, айқын болашаққа нық сеніммен батыл қадам жасауға шақырады.

Күн санап өзгеріп жатқан дүбірлі дүние жүзінде мемлекетімізге қызыға қарайтын елдер көбейді. Заман ағымына дәуірдің жағымды жақтарын бойына сіңіріп, ұлы дала елі де көз алдымызда ілгері дамып келеді. Бәсекелестікке қабілеттілігіміз артып, алпауыт державалар санасатын күйге жеттік. Енді осы сарабал



саясатты жалғастыруымыз дамушы республикамыз үшін өте маңызды.

Сөйтіп, қазіргі таңда қазақстандықтар ел тарихының жаңа кезеңінің пайда болуының куәгерлеріміз. Оның бірегейлігі – Президент жариялаған жаңғырту процесінің бір уақытта үш бағытта: экономиканы жаңғырту, ауқымды саяси жаңғыртуға негіз болған конституциялық реформа және қоғамдық сананы жаңғырту салаларында жүзеге асырылуында.

Әсіресе, үшінші бағыты ең күрделі әрі ауқымды, себебі қазақстандықтардың алдында бұған дейін ешқашан қоғамдық сананы жаңғыртудың қойылмаған болатын. Дәл осы бағыт еліміздегі барлық ықтимал қайта түрлендірулердің өзегі болып табылады, ал оның қозғаушы күштері – алты жоба.

Олардың біріншісі – қазақ тілінің латын графикасына біртіндеп ауысуы. Жоба тілді дамытуға жаңа серпін беруге және оны әлемдік кеңістікке ықпалдастыруға, азаматтарды тілді үйренуге ынталандырып, қызығушылықтарын оятуға бағытталған.

Екінші жоба – «Қазақ тіліндегі 100 жаңа оқулық». Оның мақсаты – қазақстандық студенттерге әлемнің ең үздік оқулықтарын қазақ тілінде оқуға мүмкіндік беру.

Үшіншісі – «Туған жер» жобасы, оны жүзеге асыру, біріншіден, адамның өзі туып-өскен жерімен байланысын нығайту. Екіншіден, елімізде қайырымдылық мәдениетін жетілдіру және жауапты әлеуметтік іс-қимылдар арқылы мемлекеттік қолдау көрсету шараларын дамыту.

Үшіншіден, ғылыми-білім беру және инфрақұрылымдық қолдауды қамтамасыз ету – тарихты, географияны, туған өлке нысандарын зерттеу және оның көркейтілуі. Жалпы алғанда, бұл маңызды өлкетану жұмыстары басталғанын білдіреді.

Төртінші жоба – «Қазақстанның сакралды географиясы». Мұндағы жұмыс мәдени ескерткішке, символдық, сакралдық және мәдени-тарихи заттарға байланысты болады.

Бұдан өзге, аталған жобаның нысандары туризм индустриясын дамыту орындарына айналады.

Бүгінде «Жаһандағы заманауи қазақстандық мәдениет» жобасы аясында қазақ мәдениетінің үздік туындыларымен әлемдік қауымдастықты таныстыру үшін жағдайлар жасалып жатыр. Бұл отандық шығармашылық зиялыларына үлкен мүмкіндіктерге жол ашады.

«Қазақстандағы 100 жаңа есім» жобасы еліміздің әр түкпірінен, түрлі жастағы адамдардың, сан алуан ұлт өкілдерінің арасынан отандастарына үлгі болатын, табысқа жеткен адамдардың тарихынан тұрады. Аталған жүз және одан да көп жаңа есім заманауи Қазақстанның келбеті мен бейнесіне айналады.

Осы жобалардың барлығы үлкен өзектілікке және терең мағынаға ие, өйткені жаңғырту – өте күрделі процесс. «Рухани жаңғыру» елімізді сапалы қайта түрлендіруге негіз болатын идеялық платформа.

Қорытындылай келе, ұлт көшбасшысы Нұрсұлтан Назарбаевтың «Болашаққа бағдар: рухани жаңғыру» атты бағдарламасы – руханиятқа тың серпін беріп, санаға сілкініс әкелген қадам болып табылады. «Жұмыла көтерген жүк жеңіл» демекші, мәңгілік ел боламыз десек, қазіргі таңнан бастап жаңғыру жолында бабалардан мұра болып, қанымызға сіңген, бүгінде тамырымызда лүпілдеп жатқан ізгі қасиеттерді қайта тулатуымыз керек. Президентіміздің мақаласында өркениеттің жақсысын алып, жаманынан жирену жөнінде өте құнды пікірлерінен түйіндейтін халқымыздың ендігі міндеті - осы айтылғандарды іске асыру жолында аянбай еңбек ету.

Ерик АКИМЖАНОВ,
ҚР ІІМ Академиясы күндізгі
оқыту факультетінің
аға оқытушы-әдіскері,
полиция подполковнигі

